

Møtebok for Kyrkjeleg fellestråd i Kvam

Saksnummer: OSL/11/23
Innkallingsdato: 16. nov 2023
Møtedato: 6. des 2023
Møtestad: Norheimsund kyrkje
Møtetid: 19.30- 20.30

Medlemer tilstades på møtet: 10 Lisbeth Henriksen
Ida Lindøe
Arne Opsahl-Engen
Astrid Lunestad
Astrid Helleve Fylkesnes
Magne Kolstad
Vetle Karlsen Eide
Kjell Dysvik
Margunn Tordal
Tor Håkon Berge

Varamedlemer tilstades: ingen

Meldt forfall: ingen

Andre: Olav Skeie Lid, sekretær

Møteleiar: Margunn Mikkelsen Tordal

Saker som vart drøfta: Sak 40/23 til og med sak 45/23

Sak 40/23 Godkjenning av innkalling, sakliste og møtereferat

Samrøystes vedtak: Sakliste og innkalling til dagens møte vert godkjende.

Sak 41/23 Meldingar

Samrøystes vedtak: Kvam kyrkjelege fellesråd tek dei framlagde meldingar til vitande.

- Me er i budsjett-tid. Framlegget frå rådmannen fylgjer velkjente spor: me får nok litt mindre enn det som var vona, når det gjeld driftsbudsjett. Rådmannen sitt framlegg til politikarane er at kyrkja skal få kr 6 376 000,- i kommunalt tilskot for 2024. Dette er ein auke på 4,3 % frå fjoråret. Me bad i vårt framlegg om kr 6 700 000,- Kva politikarane til sist landar på, - det veit ingen. Det me veit, er at kommunen på generelt grunnlag har tronge rammer på driftssida, og at kyrkja ikkje er noko unntak i så måte. Kyrkjeverjen vil arbeida med budsjett framover, med tanke på å tilpassa oss det tilskotet me får. Men det er ingen grunn til å leggja skjul på at kostnadsauken både på løn og på andre driftsmiddel er på langt meir enn 4,3% Her er det ei gap som må fyllast, anten ved auka inntekter, eller ved sparing. Fellesrådet vil få dette på sitt bord på sitt første møte i januar, når det kommunale budsjettet er vedteke.
- På investeringssida har rådmannen funne rom for 7,5 mill i investering til å ta ned taket på Strandebarm kyrkje, gjera dei nødvendige tiltak, og leggja opp att den delen av skiferen som framleis held mål, og skifta ut det som trengs. I tillegg skal koparhjelmene på tårnet skiftast ut, og enkelte vindaugo bytast. Her har i tillegg riksantikvaren som kjent løyvt kr 1,5 mill til dette tiltaket. Dialog med kommune, riksantikvar og bispedøme er i gang, og fellesrådet vil få på sitt bord dei naudsynte sakspapir med omsyn til vedtak av val av prosjektleiar, utarbeiding av anbudsdokument etc. Noko av dette arbeidet er på gang, men ein kan ikkje forskottera vedtaket i heradsstyret for tidleg.
- Den namna minnelunden i Øystese var også på lista over ynskta investeringar frå fellesrådet si side, men denne nådde ikkje opp i konkurransen om dei kommunale investeringsmidlane i rådmannen sitt framlegg. Her er det enno von i hangande snøre, og det vert opp til lobbyistar og heradsstyre å sjå om det er rom for dette på neste års budsjett. Summen er estimert til 2,2 mill. ***I skrivande stund ser det likevel ut til at denne minnelunden vert realisert i 2024. Kvam heradsstyre handsamar budsjettet torsdag 7. des, og i innstillinga frå formannskapet er det funne rom for denne investeringa med kr 2 500 000,-***
- Me har no gått over til Kvam kraftverk som leverandør av kraft til alle våre kyrkjer og anlegg. Me har no fått bunde vinterprisen fram til april 2024 på eit fornuftig nivå.
- Overgangen til Azet som leverandør av rekneskapstenester er også i gang. Dei vil overta frå 1. januar 2024, slik som avtala. Det vert likevel Aider som vil avslutta rekneskapen for 2023 utpå våren 2024, naturleg nok.

Sak 42/23 Val av leiar og nestleiar i Kvam kyrkjelege fellesråd for 2024

Desse vart valde:

*Som leiar for eitt år: * Margunn Mikkelsen Tordal, 9 røyster for, ei blank*

*Som nestleiar for eitt år: * Astrid Helleve Fylkesnes, 9 røyster for, ei blank*

Sak 43/23 Godkjenning av nye gravplassvedtekter

Samrøystes vedtak: Kvam kyrkjelege fellesråd godkjenner dei framlagde vedtektene som gjeldande, og sender dei over til statsforvaltaren i Vestfold og Telemark for endeleg godkjenning.

Saksopplysningar: Dette er ei andregongs-godkjenning etter høyringsrunde. Det kom ingen innspel i høyringsrunden, og framlegget til vedtekter er difor uendra frå det opphavslege framlegget frå førre møte. Det har kome ein bekymra tanke opp hjå kyrkjeverjen: fleire har ringt og spurt om det er opning for at eksisterande graver kan slettast, og namna til tidlegare gravlagde sette på den namna minnelunden, når den er etablert. Vedtektene opnar for dette, etter søknad og løyve hjå kyrkjeverje. Mi bekymring er at dette skal få eit stort omfang? Dette var først og fremst tenkt som eit nytt tilbod for dei som skal gravleggjast, og ikkje primært for å flytta eksisterande gravminne? Samstundes er det vanskeleg å sjå for seg eit forbod mot dette. Det må nok handsamast undervegs, og kan regulerast med økonomi og avgifter, dersom det vert ei stor utfordring.

For øvrig trur kyrkjeverjen at vedtektene er framtidsretta og tenlege på alle vis.

Framlegg til

GRAVPLASSVEDTEKTER, KVAM HERAD, VESTLAND

Jf. lov av 7.juni 1996 nr. 32 om gravplassar, kremasjon og gravferd (gravplasslova) § 21 (1) , § 8 (1) og § 14 (1) og forskrift til lov om gravplassar, kremasjon og gravferd av 10. januar 1997 nr. 16 (gravplassforskrifta) § 15a (4), jf. gravplasslova § 14 (1) og § 21.

Vedtatt av Kvam kyrkjelege fellesråd2023

Godkjent av Statsforvaltaren i Vestfold og Telemark (dato)

§ 1 FORVALTNING

Gravplassane i Kvam herad er underlagt Kvam kyrkjelege fellesråd.

§ 2. DEFINISJONAR

Gravplassmynde: Kvam kyrkjeleg fellesråd under utøving av forvaltningsansvaret sitt for gravplassane i Kvam kommune, jf. gravplasslova med forskrifter.

Fri grav: Grav som gravplassmyndet har tildelt ein avdød person frå kommunen, og som det ikkje blir betalt festeavgift for i fredingstida.

Festa grav: Grav som det er inngått eller fornya festeavtale for, jf. gravplasslova § 14.

Festa gravstad: Fleire kistegraver som er festa saman.

Ordinær urnegrav: Grav til oskeurne med plass til fire urner, jf. gravplassforskrifta § 14.

Urnegrav i minnelund: Grav til oskeurne i minnelund med plass til éi urne.

Kistegrav: Grav som stettar forskrifta sine krav til storleik for gravlegging av kister. I ei kistegrav kan det også gravleggjast urner.

Fredingstid: Tidsrom frå siste gravlegging til grava kan takast i bruk igjen til ny gravlegging.

Festetid: Tida det er avtala å feste ei grav for.

Ansvarleg for grav: Den som er ansvarleg for ei fri grav.

Festar: Den som står som part i ein festeavtale.

Anonym minnelund: Gravfelt for anonyme graver. Feltet kan ha eit felles minnesmerke utan opplysningar om kven som er gravlagt.

Namna minnelund: Gravfelt med felles minnesmerke med namn og data på dei som er gravlagde der.

§ 3. FERDSEL PÅ GRAVPLASSANE

Besøkjande skal omogeleg ferdast gåande, jf. gravplassforskrifta § 9 (↔). Gravplassmyndet kan etter søknad gi løyve til å køyre ved dokumentert sjukdom/forflyttingshemming. All køyring skal skje særleg omsynsfullt.

§ 4. GRAVPLASSTILHØYRSLE

Avdøde personar i kommunen kan gravleggjast på kva som helst av gravplassane i kommunen. Dei har rett til fri grav så langt grav er tilvist.

Avdøde personar som på grunn av sjukdom eller alderdom har budd i ein annan kommune mot slutten av livet, blir medrekna på same måte som kommunens egne innbyggjarar, og har rett til fri grav så langt grav er tilvist.

Avdøde personar frå andre kommunar kan bli gravlagt i kommunen mot at kostnadane ved gravferda og avgift som ved feste av grav blir betalt.

§ 5. FREDINGSTID

Fredingstid for kistegraver er 25 år.

Fredingstid for urnegraver er 20 år.

Gravplassmyndet kan vedta lengre fredingstid for enkelte graver.

§ 6. FESTE AV GRAV MED MEIR

Når kistegrav skal takast i bruk, er det høve til å feste ei grav ved sida av, og etter søknad til gravplassmyndet; for ei ekstra grav i tillegg når behovet tilseier det. Desse gravene utgjer då éin gravstad.

Ved bruk av ordinær urnegrav, kan det bli festa ei grav ved sida av.

Ved bruk av urnegrav i namna minnelund kan ein og feste ei grav, men av praktiske årsaker vil ikkje urnene koma ved sida av kvarandre på gravfeltet, men koma saman som namn på felles minneplate eller som to namneplater etter kvarandre.

Ved feste av grav ved sida av den kistegrava som blir tatt i bruk, er festetida **10** år.

Når festetida/fredingstida er ute, kan grava/gravstaden bli festa for nye 10 år. Når det er gått 60 år etter siste gravlegging, kan festet ikkje bli fornya utan etter særleg samtykkje frå gravplassmyndet..

I god tid før festetida er ute skal festaren bli varsla. Er ikkje festet blitt fornya innan seks månader etter forfall, fell grava eller gravstaden tilbake til gravplassen.

Innbetalt festeavgift blir berre betalt tilbake dersom tilbakebetaling følgjer av bindande rettsreglar eller det ligg føre særlege grunnar.

Ingen kan bli gravlagt i festa grav/gravstad utan festaren sitt samtykkje. Dersom det ikkje er råd å hente inn samtykkje frå den ansvarlege eller festaren til bruk av grav, kan gravplassmyndet ta avgjersle om gravlegging.

Festar pliktar å melde adresseending.

§ 7. GRAV OG GRAVMINNE

Ved opning av grav kan jord bli lagt på omkringliggande graver og gravutstyr kan mellombels bli flytta. Gravplassmyndigheita sørgjer for istandsetting igjen, og vil også sjå til at grava blir planert og tilsådd med gras etter gravlegging. Montering av gravminne kan først skje etter at gravplassmyndet har godkjent gravminnet og merka staden der det skal stå. Det kan ikkje bli sett opp tidlegare enn 6 månader etter gravlegging av kiste. Gravminne på urnegrav kan bli sett opp med ein gong etter urnenedsetting. Så lenge ein ventar på gravminne, sørgjer gravplassmyndet for eit merke med avdøde sitt namn på.

På nyfesta gravstad skal gravminnet plasserast sentralt i bakkant av gravstaden. Gravminne skal stå på ei av gravene ved felles gravstad/ektefellegraver. Midtstilling er ikkje tillete.

§ 8. PLANTEFELT

Framfor gravminnet er det høve til å opparbeide eit plantefelt i høgde med bakken omkring. Det må ikkje vere breiare enn gravminnet si breidde, men kan i alle tilfelle vere opp til 60 cm breitt. Det kan ikkje stikke lengre fram enn 60 cm, målt frå gravminnet sin bakkant. Det kan ikkje plantast vekstar som overstig gravminnet si høgde eller går utover plantefeltet.

Det er ikkje høve til å bruke faste dekorgjenstandar som blomsterurner, lykter mv. i plantefeltet. Det er høve til å tenne stearinlys og oljelampe på grava, så lenge dette er innanfor gjeldande reglar om brannvern. Stearinlys, oljelamper og andre lause dekorgjenstandar skal fjernast etter bruk.

Det er høve til å ramme inn plantefeltet med ein delt steinkant som fluktar med terrenget omkring.

Dersom det ikkje er aktuelt å ha plantefelt, skal det vere grasbakke på alle sider av gravminnet.

Det er ikkje høve til å ramme inn grava med hekk eller døde materiale. Planting bak gravminne er ikkje tillete.

§ 9. PLANTEMATERIALE

Planter, kransar og liknande materiale som blir nytta ved gravferd eller ved pynting av grav og som endar som avfall, skal fullt ut vere kompostérbare.

§ 10. STELL AV GRAV

Kvar ansvarleg for frigrav eller gravfestar har rett og plikt til å stelle den grava vedkomande har ansvaret for. Plantefelt som ikkje blir tilplanta eller stelt skal såast til av den ansvarlege eller bli sådd til av gravplassmyndigheita.

Ansvarleg for grav eller festar pliktar å halde gravminnet sikra og i forsvarleg stand.

Ansvarleg for grav eller festar kan gjere avtale om at kyrkjelege fellestråd, og den som får løyve til det etter § 13, kan utføre planting og stell av grav, samt montering, sikring og vedlikehald av gravminnet. Ein slik avtale frittek ikkje den ansvarlege eller festar frå det ansvaret dei har etter reglane som til ei kvar tid gjeld.

§ 11. NAMNA MINNELUND

Namna minnelund består av urnegraver.

Ved gravlegging i namna minnelund skal namn og data til avdøde førast på ei standard namneplate på felles minnesmerke fastsett av gravplassmyndet. Namneplata kan ha namn på to personar.

Pårørande kan velja om dei vil vera med eller ikkje når urna skal setjast ned på den namna minnelunden. Det er høve til å leggja ned ein enkel blom og/eller lys berre den dagen urna vert sett ned. Dette vert fjerna av tilsette på gravplassen dagen etter.

Gravplassmyndet kan gje løyve til at namn på person vert flytta til gravminne på ei eksisterande grav eller eksisterande namneplate i namna minnelund eller urnevegg ein annan stad enn der vedkomande er gravlagt. Namnet må då fjernast frå den opprinnelege plasseringa.

Urnegraver i namna minnelund kan bli festa etter fredingstidas utløp på lik linje med andre urnegraver på gravplassen. Det vil likevel ikkje vere høve til å gravleggje på nytt i urnegrava i festetida. Minneplata vert fjerna når grava ikkje vert festa lenger.

Avgift for bruk av namna minnelund blir betalt frå det tidspunktet grava blir tatt i bruk og skal dekke kostnader ved namneplate og felles tilplanting.

Gravplassmyndet har ansvaret for felles tilplanting og stell i minnelunden. Det er ikkje høve til å opparbeide eige plantefelt for grav i minnelund. Det kan berre setjast ned avskorne blommar og tennast gravlys i særskilde vasar og lykter sett opp av gravplassmyndet..

§ 12. BÅREROM

Bårerom blir disponert av gravplassmyndigheita, og skal berre nyttast til oppbevaring av døde i tida fram til gravferda. Ingen har tilgang utan etter løyve. Liksyning kan berre finne stad etter samtykke frå den som står for gravferda, og vedkjem ikkje dei tilsette.

§ 13. NÆRINGSVERKSEMD

Næringsdrivande som ønskjer å drive verksemd på gravplassen skal hente inn løyve frå gravplassmyndet.. Løyvet kan kallast tilbake dersom vedkomande ikkje rettar seg etter dei reglane som gjeld. Slik verksemd kan berre omfatta montering, sikring og vedlikehald av gravminne, og tilplanting og stell av graver.

§ 14. ARBEID PÅ GRAVPLASSANE

Anleggs- og vedlikehaldsarbeid skal skje på kvardagar i arbeidstida (kl. 07:00-17:00) og må ikkje utførast på sundagar, heilagdagane eller offentlege høgtidsdagane. Ikkje noko arbeid på gravplassen må vere til sjenanse for seremoniar eller rituelle handlingar på gravplass eller i bygning på gravplass. Næringsdrivande kan berre køyra på gravplassen i den grad det er nødvendig for å utføre arbeidet. Slik køyring skal skje ekstra omsynsfullt.

§ 15. DISPENSASJON FRÅ VEDTEKTENE

Gravplassmyndet kan ved særlege høve og innanfor ramma av gravplasslov og gjeldande forskrifter fråvike vedtektene.

§ 16. IKRAFTSETJING OG OPPHEVING AV ELDRE VEDTEKTER

Denne forskrift om gravplassvedtekter trer i kraft frå xx.xx.20xx. Frå same tid blir [vedtekter \(set inn eldre vedtekters dato og ev. nummer\) for gravplassane i NN kommune](#), YY (erstatt YY med rett fylke), oppheva.

Sak 44/23 Godtgjersle for rådsmedlemer

Samrøystes vedtak: Dagens ordning, der leiar i sokneråd og leiar i fellesråd får ei godtgjersle tilsvarande 1,3% av kyrkjeverja si løn, vert vidareført. Dei andre verva i fellesråd og sokneråd er utan godtgjersle.

Det er svært stor skilnad i kyrkje-Noreg korleis ein godtgjer kyrkjelege verv. Det er heilt klart eit offentleg verv, som har like stor rett på kompensasjon for tapt arbeidsforteneste som å sitja i heradsstyre. Mange stader har ein dagmøte, med møtegodtgjersle til alle, både i sokneråd og fellesråd.

I Kvam har me tradisjonelt lagt oss på ei varsam line reint økonomisk, sikkert også med bakgrunn i ein ofte trong økonomi opp gjennom åra. Verva som soknerådsleiar og fellesrådsleiar har difor som dei einaste, vore godtgjort i storleik 1,3% av kyrkjeverje si løn.

Ut frå historie og tradisjon – og økonomi! - er difor tilrådinga at me held fram etter same leisten.

Sak 45/23 Møtedatoar og tidspunkt våren 2024

Samrøystes vedtak: Kvam kyrkjelege fellesråd vedtek framlagd møteplan for våren 2024 som gjeldande.

Onsdag 10. januar

Onsdag 20. mars

Onsdag 24. april

Onsdag 5. juni

Endeleg budsjett, vedlikehaldsplan

Årsmelding, rekneskap

1. kvartalsrapport

Justert budsjett, tilsetjing ny kyrkjeverje

Alle møte er frå kl 17.00 – 19.00